

Ro Ri Israel Re Jab Tōmak Anij

Kōttōpar ko an katak in:

- Kwaļok bwe e nana ñe je jab tōmak Anij.
- Kwaļok bwe Anij e kwōjarjar, im Ej kajeik jerōwiwi.
- Kwaļok jouj im tūriamo an Anij.
- Kwaļok bwe lōmōor ej kōn bōtōktōken Jisōs wōt.

Meļeļe ko reļap ilo katak in:

- Jen lo bwe jej aolep ri jerōwiwi.
- Jen lo bwe jen tōmak Anij aolep iien.
- Jen lo bwe e nana lotaan.
- Jen lo bwe bōtōktōkin Jisōs ej unin an Anij maroñ tūriamokake kōj.

Anij ear letok Baibōl eo bwe en likio ad meļeļe kōn wāween bōk lōmōor. Ilo Baibōl ewor jiljinoñoul jiljino book ilo ruo mōttan. Kallimur Mokta ej foundation eo, im Kallimur Ekāāl ej em eo. Ilo bar juon wāween ba, Kallimur Mokta ej annañin Kallimur Ekāāl, im Kallimur Ekāāl ej kein kōmmeļeļeik Kallimur Mokta. Jet iaan meļeļe ko re ļap me jej lo ilo katak kein rej bwe Anij wōt e kwōjarjar im kōj aolep ri nana. Anij wōt e maroñe, im kōj aolep ri ban. Eļañne kōj ri ban innām jej aikuje juon kajoor ak maroñ tuliken kōj ñan kowānōk kōj. Kajoor in ej bōtōktōken Jisōs Kraist. Rainin jej katak kōn kajoor in. Rainin jej katak kōn juon bwebwenato ilo Kallimur Mokta me ej kwaļok joñan an aorōk tōmak.

1. Anij e kwōjarjar im jouj.



Rom 3:20 Bwe ejjelok kanniok enaaj wānōk imaan mejān kōn jermal ko an kien, bwe je jeļā jerōwiwi kōn kien.

Ke Anij ear liļok kien ko Joñoul ñan ri Ju ro, Ear kwaļok ñan er bwe joñan An kwōjarjar ejjelok juon armej e maroñ kepāākļok E kōn an make kajoor ak an make wānōk. Anij ear jiroñ ri Ju ro bwe ren kalok juon mōn kōppād. Un eo ej kōnke Ear kōñaan jokwe ippāer im kwaļok An tūriamo ñan er. Anij ear jiroñ Pris eo eļap bwe en wōtdikdike jikin tūriamo eo kōn bōtōktōk.

Kien ko joñoul raar pād ilowaan tōptōp in Kallimur eo. Eļañne Anij ej kallimjek wōt kien ko joñoul innām naaj ewi wāween An lōmōoren eō? Kien ko joñoul rej kaallikar bwe ña juon ri nana eļap. Juon wōt men e maroñ pinej jerōwiwi ko aō: bōtōktōk eo. Ke Pris eļap ear wōtdikdike mejān tōptōp in Kallimur kōn bōtōktōk, Anij ear katakin ri Ju ro bwe bōtōktōkin juon ri Kwōjarjar ear maroñ in lōmōorer jān lia eo an kien.



Rom 8:1 Innām kiiō ejjelok liaakļok ñan ro rej pād ilo Kraist Jisōs.

Anij ear kwaļok An wānōk im jouj ñan ri Ju ro ilo elōñ wāween. Ear lōmōoren er jān elōñ jorrāan ko re ļap.

2. Jet armej raar waate āneo.

Ke Anij ear kotak kōdō eo jān toļ Sainai, ro ri Israel rar ļoore. Jabdewōt iien ear eṃmakūt kōdō eo, raar jeļate eṃ nuknuk ko aer im mōn kōppād eo im ļoore. Innām e ļak bōjrak kōdō eo, raar kajutak eṃ nuknuk ko aer im pād ie.

Anij ear tōl er nān āneo eo me Ear kallimūr in leļok nān Ebream. Elōñ armej raar pād ilo āneo kadede, ak kōn an to aer kōmman nana im kabuñ nān ekjab, Anij ear pepe in man er im leļok āneo nān ro ri Israel.

* **Anij e kwōjarjar im wānōk.**

Anij ej yokwe aolep armej. E jab kōṅnaan bwe jabdewōt armej en jako.



2 Peter 3:9 Irooj e jab ruṃwij kōn An kallimur, āinwōt jet rej watōk ruṃwij, a Ej meanwōd nān koṃ, im jab kōṅnaan bwe jabdewōt en jako, a bwe ren otemjej itok im ukeļok ippaer.

Bōtab, kōn an armej pepe in jab pokake Anij, ekkar im jimwe bwe Anij en man er, āinwōt An kar man ro ri Sodom im man ro ri laļ in ilo ibwijlelep eo. Anij e kwōjarjar, im barāinwōt ewor An maroñ ioon aolep armej, kōnke Ear kōmanman er.

* **Anij e utiej jān aolep im Ej irooj ioon aolep men.**

Ke ro ri Israel raar tōpar tōrerein āneo, Anij ear ba nān Moses bwe en kāālōt 12 armej, juon jān kajjojo bwij iaan bwijen Israel.



Bōnbōn 13:1,2 Im Jeova ear kōnono nān Moses im ba, “Kwōn jilkinļok maan ro bwe ren wate āneen Kenan, eo Ij leļok nān ro nejin Israel; jān jabdewōt bwijin ro jimmaer, koṃwin jilkinļok juon armej, jabdewōt iaer juon irooj ippaer.”

Jerbal eo aer ej bwe ren waate āneo mokta jān an ro ri Israel deļoñ. Moses ear pokake im jilkinļok armej ro.

3. Joñoul iaan ri waate ro raar jab tōmak Jeova.

Ke ri waate ro raar roļtok, raar kwaļok nān Moses men ko raar loi. Raar kwaļok mool.

- Raar ba bwe e kanooj eṃman im kouwa āneo.
- Raar bōktok jet leen jān āneo.
- Raar ba bwe armej ro ie raar kilep im kajoor.
- Raar ba bwe jikin kweilok ko aer raar pen im elōñ aer worwor.

Joñoul iaer raar ba bwe re ban maroñ in bōk āneo.




Bōnbōn 13:31 A ļōmaro re kar ilok ippānļok, re ba, “Je ban ilen jumae armej ro, bwe re kajoor jān kōj.”

- Raar meļokļok men ko reļap me eņōj an Anij kōmņani mokta ñan jipaņ er.
- Raar jab tōmak bwe e bwe an kajoor Jeova bwe En leļok āneo ñan er.
- Raar meļokļok bwe ejjeļok men e pen ñan Anij.

4. Keleb im Joshua raar tōmak Anij.

Keleb im Joshua, ruo iaan ri waate ro, raar tōmak Anij. Raar lo armej ro re kajoor, im raar lo jikin kweilok ko re pen. Bōtab raar jeļā bwe e kajoor Anij im bwe ejjeļok men e pen ñan E. Raar kememej bwe eņōj an Anij kallimur in leļok āneo ñan er, im raar tōmak E.



Bōnbōn 13:30 Im Keleb ear kōkejekļokjeņ armej raņ iņaan Moses im ba, “Jen jarōbļok im bōk āneo, bwe je kanooj maroņ in bōk anjō jān er.”

5. Armej in Israel raar jab tōmak Anij.

- * **Armej rej ri jerōwiwi. Ej aikuj Anij bwe e jab maroņ make ļomņoren e.**



Bōnbōn 14:1-4 Im aolepen jar eo raar koutiej ainikeir im laņōj, im armej ro raar jaņ boņ eo. [2] Im ro nejin Israel otemjej raar lotaan Moses im Aron; im aolepen jar eo raar ba ñan erro, “E kanooj eņņan eļāņņe kōm ar mej ilo āneen Ijipt! Ak eņņan eļāņņe kōm ar mej ilo āne jemaden in! [3] Im etke Jeova ej āņintok kōm ñan āneen, bwe kōmin buņ kōn jāje? Kōrā ro pāleōm im ajri ro nejem renaaj men in rakim. Etke e jab eņņanļok bwe kōmin jepļaak ñan Ijipt?” [4] Im raar ba ñan doon, “Jen kāālōt juon kapen, im jen jepļaak ñan Ijipt.”

Anij ear roņ aolep men raar ba. Ear jeļā bwe raar jab tōmak E. Anij ear kallimur in leļok āneo ñan er, ak raar jab tōmak E. Ilo mool, raar ba kōn kōmņan ko aer bwe Anij e riab.

Eļāņņe kwō jab tōmak juon men me juon armej ej ba, innām ej āinwōt kwōj ļomņak e ri riab.

6. Anij ear ba bwe renaaj aolep men ilo āne jemaden eo.

- * **Anij e kwōjarjar im wānōk. Ej ba bwe ro rej jerōwiwi rej aikuj in mej.**

Anij ear illu ippaer.



Bōnbōn 14:26-30 Im Jeova ear kōnono ñan Moses im ñan Aron im ba, [27] “Ewi toņ jar in e nana enaaj lotaan ñae Eō? Iar roņjake lotaan ko an ro nejin Israel rej lotaan Eō. [28] Kwōn ba ñan er, ‘Āinwōt Ij mour, Jeova ej ba, e mool, āinwōt ami ba i Lojiliņiō, āindein Inaaj kōmņan ñan koņ. [29] Ubōmi renaaj buņ ilo āne jemaden in, im ro otemjej eņōj bwini er iami, ekkar ñan aolepen orami, jān rūttōn 20 iiō im lōņļok, ro raar lotaan ñae Eō, [30] E mool koņ jāmin deļoņ ilo āneo, me Iar kallimur kake bwe In kōmņan bwe koņwin jokwe ilowaan, I jab ba kōn Keleb nejin Jepunne, im Joshua nejin Nōn.’”

Anij ear ba bwe aolepeir me 20 aer iiō im rüttoḷok renaaj mej ilo āne jemaden eo. Renaaj roḷ im jebwābwe iumwin 40 iiō. Bōtab, Keleb im Joshua re ban mej kōnke raar tōmak Anij.

* **Armej rej aikuj tōmak bwe ren kabuñbūruon Anij im bōk ḷomḷor.**

Ej juon nana eḷap ñe je jab tōmak Anij.

- Satan ear kapoki Iv bwe en jab tōmak Anij. Ear ba bwe e ban mej im bwe enaaj emmanḷok an mour eḷaññe e jab ḷoor Anij.
- Armej ro ilo tōr eo an Noa raar jab tōmak ke Noa ear kwaḷok bwe Anij enaaj ekajet er.
- Ro ri Ijpt raar jab tōmak ke Anij ear ba ren kōtḷok ro ri Israel.

Anij ear kōḷaan kejeraamman ro ri Israel im kadeḷoñ er ilo āneo, ak kōn aer jab tōmak E, Ear kōmman bwe ren jebwābwe ilo āne jemaden eo im rütto ro ren mej ie.

7. Armej ro raar lotaan ke ejjelok limier dān.



Bōnbōn 20:2,3 Im ejjelok dān limen jar eo; im raar kweilokḷok ñae Moses im ñae Aron. Im armej ro raar akwāāle Moses, im kōnono im ba, “Enaaj kar emman wōt eḷaññe kōm ar mej ke ro jeōm im jatōm raar mej imaan Jeova!”

Etke ro ri Israel raar jab kajjitōk ippān Anij kōn dān? Emōj an Anij leḷok e mokta ḷok. Raar jab tōmak bwe Anij enaaj kabwe aikuj ko aer. Mokta ḷok, Anij ear ba bwe Moses en deñōte juon dekā bwe en waḷok dān. Kiiō, Ear ba bwe Moses en kōnono ñan juon dekā.



Bōnbōn 20:8 “Kwōn bōk jokoñ eo, im kōkweiloktok jar eo, kwe im Aron jeōm, im koḷwin kōnono ñan dekā eo imaan mejeir, bwe en lutokḷok dān ko an; im kwōn bōktok ñan er dān jān dekā eo. Āindein kwō naaj leḷok limeir ñan jar eo im kidu ko aer.”

Bōtab Moses im Aron raar illu, im raar jab pokake Anij.



Bōnbōn 20:10,11 Im Moses im Aron raar kōkweiloktok jar eo imaan dekā eo. Im ear ba ñan er, “Koḷwin roñjake kiiō, koḷeo ri kapata; kōmin bōkwōj ñan koḷ dān jān dekā in ke?” Im Moses ear kotake pein, im ear deñḷoke dekā eo ruo alen kōn jokoñōn; im eḷap an dān tḷorḷok, im jar eo raar idaa, im kidu ko aer.

Moses ear deñōte dekā eo im jab kōnono ñan e. Ear jab koutiej Jeova im tōmak E. Kōn men in, Anij ear ba bwe Moses im Aron re ban deḷoñ ilo āne in kallimur eo. E aorok tōmak Jeova.



Bōnbōn 20:12 Im Jeova ear ba ñan Moses im Aron, “Kōn amiro jab tōmak Eō, bwe koḷwin kokwōjarjar Eō ilo mejān ro nejin Israel, innām koḷiro jāmin āñinḷok jar in ñan lowaan āneo Iar leḷok ñan er.”

8. Ro ri Israel raar bar lotaan.

* **Armej rej ri jerowiwī. Ej aikuj Anij bwe e jab maroñ make ḷomḷoren e.**

E mōkaj an ro ri Israel meļokļok kajoor eo an Anij, im raar bar lotaan.



Bōnbōn 21:4,5 Im raar etal jān toļ Hor ilo iaļ ñan Lomaļo E Bōrōrō, bwe ren kōpool āne Idōm, im armej ro raar kanooj ebbeer kōn iaļ eo. Im armej ro raar kōnono ñae Anij im ñae Moses, “Etke koṃ ar āñintok kōm jān āneen Ijpt bwe kōmin mej ilo āne jeṃaden? Bwe ejjeļok mōñā im ejjeļok dān, im kōmij mōk kōn mōñā in e nana.”

9. Anij ear jilkinļok jedpānit baijin ko bwe En kajeik ri Ju ro.



Bōnbōn 21:6 Im Jeova ear jilkinļok jedpānit baijin ko ilo bwiljin armej ro, im raar kij armej ro, im elōñ armej in Israel raar mej.

Jeova ear ekajet ri Ju ro kōn aer jerōwiwi. Anij e kwōjarjar im Ej dike jerōwiwi. Eṃōj an Anij ba jān jinoin laļ in lik tak bwe oņean jerōwiwi mej. Anij ear kōṃṃan bwe elōñ jedpānit (snake) baijin ren waļok ñan kajeik ri Ju ro. Ejjeļok juon ri Ju ear maroñ in ko jān jedpānit ko. Ejjeļok juon armej e maroñ ko jān kaje eo an jerōwiwi.

Jen keememej wōt bwebwenato ko kōn Noa im Lot. Ejjeļok juon armej im ear ko jān ibwijleplep eo, im ejjeļok ear maroñ in ko jān kijeek eo ilo Sodom im Gomora. Anij wōt e maroñ lōmoṃoren kōj jān jerōwiwi ko ad. Wōn e maroñ mour indeeo kōn an make tiljek? Wōn e maroñ wānōk im mour ilaņ ippān Anij kōn an make niknik ilo kien ko joñoul. Ejjeļok!

10. Jedpānit eo kōṃṃan jān bronze.




Bōnbōn 21:7 Im armej raar itok ñan ippān Moses im ba, “Kōm ar jerōwiwi bwe kōm ar kōnono ñae Jeova im ñae eok. Kwōn jar ñan Jeova, bwe En bōkļok jedpānit ko jān ippem.” Im Moses ear jar kōn armej ro.

Ri Ju ro raar kile bwe renaaj mej. Raar kile bwe raar jerōwiwi ñae Anij. Raar barāinwōt jelā bwe Anij wōt ear maroñ in tūriaṃo kake er. Moses ear jar ñan Anij. Jeova ear jiroñ Moses bwe en kōṃṃan juon annaņin jedpānit jān bronze.



Bōnbōn 21:8 Im Jeova ear ba ñan Moses, “Kwōn kōṃanṃan juon jedpānit baijin, im lelōñļoke ioon jurōn flag; innām jabdewōt eo eṃōj kije, ñe ej kalimjeke, enaaj mour.”

Bōlen jet iaan ri Ju ro raar ba, “Eļap an pidodo men in. Ewor juon men ij aikuj kōṃṃane. Ñe ej free innām ejab aorōk; ejab laļ tokjān.” Bōlen jet raar ba, “Ekwe e jab kanooj laļ aō jorrān. I maroñ mour meñe I jab reilok ñan men eo.”



Bōlen jet raar ba, “O, e jab kiiō. Juon raan inaaj reilok. I jaņin pojak.” Ilo mool, bōlen jet raar jab reilok kōnke raar jab tōmak bwe renaaj mour kōn aer kalimjek juon jedpānit kōṃṃan jān bronze. Erri kiiō? Raar mej. Ro im raar reilok raar mour. Raar jab aikuj reilok koba jermal. Raar jab aikuj joļok jet jerōwiwi im karreoik aer mour moṃta jān aer reilok. Moses ear lamōj im ba, “Reilok wōt!” Armej ro raar aikuj kile joņan aer nana im aer ban, im raar aikuj

tōmak men eo Anij ear ba.

* **Armej re maroñ kepaak Anij ilo wāween an Anij ba wōt.**

* **Armej rej aikuj tōmak bwe ren kabuñbūruon Anij im bōk lōmōḡor.**

11. Jedpānit bronze in ej jutak kōn Jisōs Kraist.

Jisōs ear kajerbal bwebwenato in āinwōt juon wan joñak kōn E make im kōn meḷeḷein “bar lotak.” Nikodimōs ear bwebwenato ippān Jisōs, im Jisōs ear ba ñan e bwe ej aikuj bar lotak. Ke e jab meḷeḷe, Jisōs ear kwaḷok wan joñak in.



Jon 3:14,15 Im āinwōt Moses ear lelōñḷok jedpānit eo ilo āne jemaden, āindein naaj lelōñḷok Nejin armej; bwe jabdewōt eo ej tōmak ilo E en mour indeeo.

Kōj aolep ri jerḡwiwi im e alikkar bwe jenaaj mej juon raan. Ejjeḷok juon men im je maroñ kōmḡmane bwe jen mour indeeo. Jisōs wōt e maroñ jipañ kōj. Jen tōmak ilo E. Ewi wāween tōmak? Jen tōmak ilo ejja wāween an kar ri Ju ro tōmak.

Ekwe, ri Ju ro raar tōmak ta kōn jedpānit eo? Raar tōmak bwe renaaj mour jān nañinmej eo aer. Raar tōmak naan ko me Moses ear ba kōn jedpānit eo. Kwōj ke tōmak men ko im Baibōl ej ba kōn Jisōs? Kwōj ke tōmak bwe Jisōs im E wōt e maroñ lōmōḡoren eok? Kwōj ke tōmak bwe eḷap an bwe bōtōktōken Jisōs?

Eḷaññe kwōj kobaik jabdewōt bar juon men ippān jermal eo an Jisōs Kraist ḡa ion debwāāl, innām kwō jab tōmak. Eḷaññe juon armej ej kobaik peptaij, innām ejab tōmak. Eḷaññe juon ej ba niknik ñan jemḷoken, innām ejab tōmak. Eḷaññe juon ej ba kōjparok kien ko joñoul innām ejab tōmak.



Galetia 2:21 I jab kajekḡoḡon jouj an Anij, bwe eḷaññe wānōk ej kōn kien, innām an Kraist mej e jettokjān.

Kwōn jab kawaane jouj an Anij. Kwōn lōke bōtōktōken Jisōs Kraist wōt im mōj ñan kawānōk eok imaan mejān Anij.

Kajjitōk ko

1. Ewi men eo eḷap im kōj aolep je ban e?
2. Ewi men eo im e maroñ kawānōk kōj?
3. Kien ko joñoul rej kwaḷok ta ñan kōj?
4. Ejjeḷok liaakḷok ñan wōn?
5. Ewi nana eo mōkta im ri Ju ro raar kōmḡmane ilo bwebwenato in?
6. Ewi wāween an kar Anij kajeik er?
7. Etke e nana in jab tōmak Anij?
8. Ke ri waate ro raar itok jān āneo, ro ri Israel raar tōmak Anij ke? Ta kaje eo aer?
9. Ke armej ro raar bar lotaan, ewi wāween an Anij kajeik er?
10. Ewi wāween bwe jedpānit bronze eo ej āinwōt Jisōs Kraist im ta eo ej katakin kōj kōn lōmōḡor?